

東瀛識略卷二

無錫丁紹儀杏舫纂

糧課

舊制人戶以籍爲定就戶計口按口徵賦謂之丁糧各省人丁每口歲徵銀一二錢上下多至四五六錢有奇有多至一二兩四兩零者僅直隸江西山西數邑而已臺灣循鄭氏之舊每丁歲徵銀四錢八分六釐全臺人丁初祇具報一萬六千八百餘口糧額旣重隱匿實多康熙五十三年欽奉

恩諭嗣後丁糧以五十年丁冊爲額續生人丁爲

東瀛識略

卷二

一

盛世滋生戶口永不加賦是年合計新舊丁口一萬八千八百零應徵銀八千九百餘兩五十五年廣東疆臣請將丁銀攤入地糧勻徵雍正閒各省繼之彼時臺灣未議攤也乾隆元年

高宗特諭臺灣丁糧著照內地例酌中減則每丁徵銀二錢以紓民力自是年始實徵銀三千七百六十餘兩逮十二年乃議勻入田園徵收其番衆所耕田地概不完賦仍照舊就丁納糧百餘年來臺地之熙熙穰穰衣租食稅於光天化日下者殆二百萬語以口賦知者鮮矣

有田卽有賦今稱爲地糧唐建中前所謂租是也臺灣
田賦獨與內地異內地止有田而臺灣兼有園園者
旱地田乃有水之區內地之田論畝臺灣則論甲澎
湖則論種每甲東西南北各二十五戈每戈長一丈
二尺五寸地之方圓廣狹不整者以尺寸折算乃荷
蘭授地法後卽因之覈以內地弓步每甲計田十一
畝三分零種則每穀一石折地七畝四分七釐五毫
內地之賦有銀有米有麥豆有折色有本色臺灣則
止納粟且有本色而無折色澎湖則每種一石徵銀
四錢二分合計每畝徵銀五分六釐零不分田園亦

東瀛識略

卷二

二

不徵粟米噶瑪蘭兼有餘租謂取其額徵供粟以外
所餘之租也內地田賦每畝科銀一二釐有奇至一
二錢零不等米則三撮起至七八升而止卽江浙漕
糧最重亦止每畝科米一斗九升零臺灣則每甲上
田徵粟八石八斗中田七石四斗下田五石五斗上
園五石中園四石下園二石四斗以二粟一米與每
甲十一畝零科計每畝上田完米三斗九升零下園
亦一斗一升零殆承鄭氏重斂之餘未及議減而民
不病者地力有餘無憂不足耳雍正九年奉

世宗諭自七年始新墾田園化甲爲畝改照同安上中下

則例起科計畝銀米分徵仍代納以粟爰定一甲爲十
一畝每畝上田徵銀八分零米六合零合之每甲輸
粟二石七斗零中田徵銀六分零米三合零合之每
甲輸粟二石八升有奇下田徵銀五分零不徵米合
之每甲輸粟一石七斗五升零上園視中田中園視
下田下園視中園少差每甲輸粟一石七斗一升零
較之舊則僅三之一焉部議科則太輕應照舊額輸
納乾隆九年復奉

恩諭不必議加仍照同安則例定額徵收厥後續報陞科
有以畝計者有仍以甲計者卽以畝計而徵粟仍以

東瀛識略

卷二

三

甲計噶瑪蘭初無上中下則之分議照淡水屯租田
比屯租六等每甲徵粟六石園比屯租四等每甲徵
粟四石嗣照同安下沙則例科算卽於六石內應完
正粟一石七斗五升零耗粟一斗七升零又四石內
應完正耗粟一石八斗八升零作爲正供其尙餘粟
四石零及二石有奇名曰餘租每石折銀一圓隨粟
繳納彰化更有水沙連社糯米之徵種種不同蓋如
此屯租田園各分六等徵租之制詳後屯政內

臺灣全郡初報墾熟田園一萬八千四百五十餘甲徵
粟九萬二千一百餘石又徵澎湖地種銀六十八兩

零此初隸版圖舊額也遞年續報陞科並豁免水冲沙壓圯陷田園歲異月殊時有增除就道光閒而言通計全臺墾熟田園三萬八千八百餘甲又三千六百二十一頃五十餘畝穀種折地一千四百三十餘畝年應徵粟二十萬五千六百餘石糯米七石六斗零餘租番銀一萬八千七百餘圓地種銀一百六十餘兩墾闢疆土較前三倍不止而應徵銀粟則止一倍有奇者新增田糧胥遵輕則起科所以裕民生卽以奠巖疆也所徵銀粟淡水悉充兵精噶瑪蘭支發文武俸廉各款及兵餉兵糧餘存廳庫備地方緩急之需澎湖支發官俸役食之餘解府充餉臺鳳嘉彰四邑一半碾充兵食一半配運澎湖內地爲各營兵精及戍兵眷米近因船少運滯奉文半運本色半改折色其折也每粟一石折價銀一兩由司在於應發臺營兵餉內扣給內地各營此收支之大較也耗羨者銀有傾鎔費米有雀鼠食不徵無以供耗旣徵卽有餘羨耗羨之所由名也雍正前徵收銀米各官有加取十之二三以資公用者民病焉

世宗博采衆論諭提耗羨歸公卽以其銀勻頒各省臣工以養其廉此養廉所由始蓋名曰歸公實於國帑無

出入也內地各省自每兩隨徵銀五六分起至一錢五六分二錢止米自二三升起至一斗四五升不等臺灣則徵粟一石隨徵耗粟一斗折銀五分勻丁銀一兩徵耗銀七分又封平餘銀二分共銀九分澎湖地糧銀一兩徵耗銀一錢就道光閒而言年徵耗羨銀一萬四千八百餘兩另有官莊番餉水陸雜餉等均每兩隨徵銀一錢年約徵銀二千兩零並充各官養廉及津貼船工公費此外如餘租屯租及田房稅鹿皮餉等不徵耗羨

鹽課亦正賦也製鹽之法有煎有曬閩皆曬鹽臺灣亦

東瀛識略

卷二

五

然初於鳳山縣屬濱海產鹽地由民自曬自賣價每不平雍正四年議歸臺灣府經管於臺灣鳳山二縣設場四曰瀨北曰瀨南曰洲南曰洲北共築鹽埕二千七百餘格後因瀨南鹽質黑而不佳移於瀨東所出之鹽盡數由官盤收入倉倉卽設於場所每石一百觔給場丁曬工番銀一錢二分募僱哨丁晝夜巡邏不准私鬻並私添埕格近有淡水廳屬之虎仔山亦產鹽居民私曬私賣雖派哨嚴緝迄未淨盡他處無有也府治設鹽館一所聽各販戶莊民赴館繳課領單每鹽一石定繳課價腳費銀三錢三分執單赴

倉支鹽運赴各廳縣售賣年無定額乾隆二十四年
始定銷鹽十一萬石嗣又加銷溢額鹽二萬石道光
初又加代銷漳州府屬官辦滯銷引鹽一萬七千石
年共應銷鹽十四萬七千石應徵正溢課銀四萬八
千五百餘兩內除臺鳳二邑應徵鹽埕餉費番銀三
千四百餘兩就餉劃支兵餉並扣發曬工運費支給
養廉役食哨餉等項外餘銀核實冊報撥充兵餉
糧與耗羨鹽課徵不及額例有處分其無關考成而爲
內地所無者更有官莊叛產官莊者歸官之業莊乃
所在處也有田有園有牛磨有塢有蔗車所徵有粟

有麵有魚有青白糖有芝麻而皆按價折銀以繳惟
淡水噶瑪蘭止徵粟澎湖無徵其莊有遺自鄭氏者
有無人田業由官墾設者有紳民請歸者有緣事充
公者其閒有已詳奏者有未咨報者有崩陷倒塌請
豁免者有籍在而產亡者有規復而隱匿者其承辦
也有舉佃首者有派胥役者其銀粟有應歸完正供
粟餉者有撥充兵餉者有備地方工程公用者有供
祠廟祀祭者就道光閒而言共計官莊一百二十餘
所年徵銀一萬九千餘兩粟三千餘石止能徵及七
八分而已叛產者抄封叛逆所遺之產也乾隆五十

三年

諭將林爽文案內叛產租息賞給戍兵每名每月銀四錢
爰有加餉名後續抄陳周全張丙等案內叛產有撥
支兵餉者有充地方辦公經費者亦有鬻供軍需者
並有未經上達者其產散在各廳縣境統歸臺灣府
遴舉佃首經徵田園各分三等每甲上田徵粟三十
二石中田徵粟二十六石下田徵粟二十石上園如
中田中園如下田下園徵粟十八石道光閒年應徵
番銀八萬餘圓合銀五萬六千餘兩亦如官莊止徵
十之七八臺地糧課欠者甚寡獨鳳山多書欠府徵

東瀛識略

卷二

七

多佃欠云

地有墾圯卽糧有陞豁且移新抵舊析彼益茲數
目糾紛不能以意斷也奈稽之志乘嘉義之諸羅
志編自雍正初年已無可覓府志與澎湖紀略鳳
山縣志咸修自乾隆三十年以前僅彰化臺灣二
縣志刊於嘉慶道光閒淡水噶瑪蘭均尙無志他
若無錫季蓉洲大令麟光海外集宛平黃玉圃觀
察叔璣赤嵌筆談武陵朱幼芝太守景英海東札
記侯官謝退谷廣文金鑾蛤仔難記略邵武朱筠
園廣文仕玠小琉球志馬平楊雙梧觀察廷理開

蘭節略藍鹿洲太守東征集姚石甫廉訪東槎紀
略史梅叔太守請開水沙連議所述皆臺事獨於
田數糧數鮮有敘及求之案牘又洊經震災兵燹
大半遺佚卽有存者亦塵封蠹食殘缺模糊故祇
能統以府而以道光閒概言之舛漏實多聊存崖
略而已我

朝輕徭薄賦惟期民生咸遂而於海外偏隅減糧定
則尤加意焉有謂臺地內山番界墾闢日廣未盡
陞科閒有報陞亦墾多報少十不及五淡水更有
業戶徵之業田者三而納於官者一無田而坐收

東瀛識略

卷二

八

餘利與內地包戶相似若分別勘丈禁革清出田
糧約可加倍意在裕正賦覈名實未可謂非昔人
所云臺灣沙地遇雨沖瀉熟田卽變荒壤且依山
臨海風大則鹹水湧入必待鹹味去盡數年乃復
兼之土脈炎熱不宜用肥耕穫二三年必荒棄兩
歲相替轉換方克有秋以今視之亦未可盡信顧
古人言之若是豈不知地有遺利所見不及後人
哉蓋體

列聖閔謨以藏富於民爲本不屑與島嶼小民競刀錐耳
定例各省丈量田畝及抑勤報墾之事永行停止

違者以違

制律論乾隆中有請丈量臺田者甫起辦林逆亂作
乃止臺民性浮易動豪強隱佔之徒一聞清丈不
免造謠生事希圖倖免然竟置之不理又似因噎
廢食不足以清姦蠹是在地方官因勢利導仿元
代檢核江南匿田令民自實於官之制責成各莊
堡頭人分清舊界內已陞者概不必論界外續
墾田園各自具報均按同安下則起科給以墾單
執憑所墾番地亦令呈明給照認完番租俾土番
得資事育有耕荒土而不報或以番田作荒地報

墾者勘實分別歸番入官不許承耕業戶則相沿
已久未易驟革俟有涉訟者因事除之以其餘利
仿照蘭廳作爲餘租藉充公用要在不加迫促不
事煩苛使民就範圍而不覺事乃易集此非良有
司不能辨非視國如家者不肯辨姑存此論質諸
後之任臺事者

稅餉

田房當稅田房稅者順治四年定民間置買田地房屋
必用布政司契尾每兩輸銀三分今謂之稅契年無
定額當稅者開設當舖質人衣物而取厚利故稅之

每鋪徵銀五兩以其開閉無常亦無定額此二款與內地同他餉則皆內地所無

厝餉屋舍餉也閩人謂家室曰厝謂屋舍亦曰厝如稱傭婦則繫其姓曰某厝稱人所居則繫以地曰某處厝厝有草瓦之別以其厝基皆官地故沿鄭氏之舊徵之臺灣縣街市瓦厝每間徵銀三錢零三釐八毫草厝每間徵銀二錢一分七釐安平鎮市厝減徵十分之四有奇歷年既久有片瓦寸草俱無未邀除免而星羅厦屋終歲不出分文者雍正初復加查驗凡得瓦厝七千九百餘間按額勻攤每間徵銀一錢五

東瀛識略

卷二

十

分零給單爲據如有倒壞許執單繳驗註銷另查新屋補其缺嘉義縣祇笨港有市厝每間徵銀多寡不等等年共徵銀二百兩零他邑無厝餉

番餉徵之熟番卽丁糧也番有公廨壯少之分初公廨番每丁年徵米一石壯番每丁年徵米一石七斗少番每丁年徵米一石三斗壯番婦與公廨番同亦有按社納銀不計丁口者雍正四年

詔免番婦一千八百四十四口其番丁納米改徵折價每石折銀三錢六分乾隆二年奉

諭番丁亦皆赤子照民丁例每丁徵銀二錢按社徵者亦

以丁計均以康熙五十年丁冊除免番婦外計男番六千八百三十八丁爲定額年徵銀一千三百六十七兩零嗣後滋生番丁永不加賦

瓦窰菜園餉瓦窰燒磚瓦者以座計每座徵銀二兩五錢菜園種菜蔬者以所計每所徵銀一兩獨嘉義縣有之他邑無

蔗車牛磨餉一以糖徵一以麵徵蔗車製糖具也以張計牛磨磨麵具也以首計每張每首均歲徵銀五兩六錢

檳榔番棧餉一者以宅計皆果屬也每宅徵銀多寡不

東瀛識略

卷二

十一

等年共徵銀一百三十六兩嘉義以北無徵

鹿皮小米餉皆徵之歸化生番以番之捕鹿獻皮並有獻小米者名其餉也鹿皮每張折輸銀二錢四分淡水番社有獻獐皮者折輸銀數與鹿皮同小米惟彰化社番獻納每石折輸銀六錢

船稅船有尖艚杉板船船渡船採捕船之分其稅有以隻計者有按其樑頭大小以擔計者每擔以百觔爲則尖艚每隻徵銀八錢四分杉板每隻半之彰化船每隻徵銀一兩一錢五分五釐渡船採捕船每擔徵銀七分七釐俗稱則有澎仔龍艚大船小船按邊

窰仔一封書等名皆往來南北各港貿易捕採不能橫渡大洋者內地江海巨舸均按樑頭科稅渡船漁船不徵也臺灣則正稅外更有規禮乾隆二年

高宗特諭海島居民置小艇捕魚以餬其口乃年有規禮爲衙門公事之用魚人多受剝削頗爲苦累著卽永行禁革若有公用必不可少之處將他項銀兩酌撥補之

港潭塭餉就蓄魚產魚之所徵之港者海水支流之處潭者平埔開窪積水甚深塭者沿墻築岸納水其中咸待魚繁以資捕取港以所計有徵銀二百二十兩

東瀛識略

卷二

三

者或六十九十餘兩少至一兩及四錢分別大小徵納潭亦以所計每所徵銀十二兩及七兩零不等塭以口計每口徵銀五十兩及七兩九錢零至五錢止亦視大小爲等差

罟罾餉漁課也就其器名之皆以張計網之巨者爲罟先駕二舟沈罟海底後用四五十人挽其兩端牽圍至岸得魚最多亦分大小大者每張徵銀十一兩七錢六分小者徵半罾有舉罾搖罾車罾等名舉罾止用一人港潭海滋皆可採捕搖罾需五六人駕龍舫船帶窰仔船捕魚海中車罾恆掛海岸上搭高寮人

在藁中將罾索用車車起以取魚之入罾者大罾每張徵銀四兩二錢次者每張徵銀二兩二錢小者每張徵銀八錢四分

罾纏綵餉三者以條計均取魚具亦漁課也罾者網上
有盪能浮水面下繫網袋無數袋掛鉛墜沈入丈餘
魚投袋中輒不能出每條徵銀五兩八錢八分纏小
於罾結網長數十丈廣五六尺冬春二時在海外捕
大魚用之綵者垂餌以鈞大繩長數十丈繫一端於
岸浮舟出海每尺許懸數鈞大小不一繩盡則返棹
而收曰放綵纏與綵每條徵銀與罾同

東瀛識略

卷二

三

蠔箔餉亦以條計蠔者蠣房也卽以爲徵餉之名隨潮
而產黏結海坪用竹二長丈餘各貫鐵於端如剪刀
然潮退時於海淺處鈎致之箔以竹爲之潮將滿時
橫插海濱雜羅水族汐則取之無一遺者二者每條
徵銀亦如罾數

網漚餉惟澎湖廳有就其捕魚之製名之網以張計口
濶尾尖用大木二枝豎豎港口長流之所名曰網桁
掛網於上魚蝦之屬隨流入內潮退舉網解尾出之
每張徵銀三兩五錢次日小網每張徵銀大網之半
再次日箔網每張徵銀一兩二錢六分小者曰小箔

網每張徵銀半箔網滬以口計用碎石圍築海坪潮長魚入滬內汐則捕焉小滬每口徵銀四錢二分大者倍之

烏魚旗餉亦漁課類納餉領旗方准採捕故以名烏魚卽鮠魚臺灣於冬至前後先出彰化之鹿仔港次及安平鎮南至鳳山之瑯嶠放子石罈中仍轉而北冬至前所捕曰正頭烏肥而美後之所捕曰倒頭烏瘦而味劣漁人伺其時先向鳳山縣請旗旗以白布爲之書烏魚旗字並船戶姓名鈐蓋縣印插於船首每旗一枝納銀一兩零五分然後駕舟舉網長百餘丈

廣丈餘一舟數十人出海採捕土人謂之討烏

臺地厝餉徵之市廛與內地門攤稅西疆房租銀相似非宋之稅閒架也瓦窰車磨檳榔等餉猶直隸之有榛栗稅甘肅之有磨課褐毯稅四川之有碾榨稅廣西之有紙劬銀船稅及港塢罟網等稅卽內地之河稅漁課特名目繁瑣耳番餉熟番所輸以其不完田糧無畝可攤是以按丁勻徵鹿皮小米納自歸化生番蓋任土作貢意每社納皮一二張至四張米則數斗至一石折銀止數錢兩餘理番官年給鹽布且倍之厚往薄來示綏懷也綜

道光閒各稅餉而言年約徵銀二萬三千餘兩緣田房當稅本無定額舟輿車磨之沈沒倒壞報陞報復亦乘除無定嘉慶前時有增益近年無矣或謂臺灣出產甚饒米糖油靛販鬻半天下其綿絲綢布日用所需則皆內地運往若設關徵稅年可得銀十餘萬於國用不無裨補竊按乾隆中臺逆林爽文平

高宗御製功臣像贊序中云臺灣一歲之收蔗薯更富若微有加賦意以致民變不能如是成功之速也後世子孫當知此意毋聽浮論富國之言庶幾恆承

東瀛識略

卷二

五

天眷耳大哉

皇言所以厚民生籌奠安者至矣蔑以加矣試卽丁糧言之臺地初闢具報丁口一萬六千八百零康熙末額編丁銀止增二千有奇洎道光中河內曹懷璞司馬瑾任淡水廳歸安胡裕堂大令國榮知臺灣縣編查保甲淡水一廳實共丁口四十二萬一千三百零臺灣一邑三十三萬五千二百有奇而流寓浮寄者不與焉推之全臺約有一百八九十萬較諸原額增逾百倍皆

盛世所滋生者一隅如是天下可知折半科之每丁

年徵銀一錢似爲不苛卽可得銀數百萬兩

聖祖豈不知後世滋生之盛丁糧之鉅顧以一詔免之不惜者民爲邦本本固邦甯

大聖人作爲固有八紘以內千古人君所不及薄海臣庶所莫能窺者況我

朝取民有制但患用之奢不患入之寡今欲取市賈繩頭之微效輕塵之委嶽意雖善左矣

以上乃二十年前狂論也咸豐九年各國新立條約美國先請在臺灣開市通商英法二國繼之同治元年於淡水之滬尾口設立洋關徵稅次年雞

籠增設分口又越歲臺灣縣之鹿耳門鳳山縣之旗後口亦准設關然所徵者洋稅閒有內地貨物附運前往者爲數無多中國商賈往來不徵如故惟各項買賣均應完納釐金釐者極言其微始自咸豐六七年閒軍用孔殷爰仿商賈家每貨抽取十百中一二積爲公用規式抽以助餉在商民食毛踐土久荷生成理當稍伸奉上之忱然

國家實爲不得已之政

文宗詔諭曾屢言之逆焰就平卽擬停止繼而變本加厲是豈創始人所及料哉初閩中試抽洋藥釐金言

官露章劾奏事幾中輟不久而湖北江南相繼議
抽今則各省且以洋藥爲釐金大宗矣臺灣釐金
至咸豐十一年始由府委員設局辦理章程與內
地大略相同數年來各商之喁喁而望希冀減免
者當不異內地商情我

朝名臣如朱文端

軾

朱文正

珪

當乾隆嘉慶初見有

以言利希寵者皆遏絕不遺餘力轉以庫帑充裕
爲可憂而不慮度支之不足噫老成謀國所見遠
矣辛未冬日又識